

Director di FMA Jerehm Campbel

Mas cu mil hoben ta meti den e problema di adiccion y nan mester di ayudo

ORANJESTAD – Fundacion Maneho di Adiccion ta un organisacion cu a lanta y ta conta cu diferente organi-

sacion gubernamental y no gubernamental. Director di FMA Jerehm Campbel a bisa BON DIA ARUBA cu na aña

2012 nan organisacion a bira mas grandi. Campbel a indica cu nan tin diferente seccion den e organisacion.

Un di nan ta e seccion di cuida boluntario, caminda hendenan cu problema di adiccion por acudi sin cu nan ta keda poni bou di curatela. E seccion di cuida boluntario aki tin un capacidad di 45 camber caminda cu aña pasa constantemente e cambernan tabata ocupa. Den aña 2013 ta mesun caso caminda tur camber di e departamento aki ta ocupa. E seccion di hendenan bou di curatela, tabata tin 34 cliente aña pasa y e aña aki tin 22 peticion pa pone 22 adicto bou di curatela. E consultorio pa asuntonan di adiccion, tin dos cu ta na Dakota y San Nicolas. Na Dakota 479 cliente ambulatorio a keda controla y na San Nicolas a wak 205. Ta trata di clientenan cu tin problema di adiccion, pero nan ta funcionando den e mercado laboral.

ACUERDO

FMA tin un acuerdo cu dife-

rente compania y ta haya un persona ta den problema di adiccion, no ta kit'e for di trabou, pero ta hink'e den un programa na FMAA. Den e organisacion mes tin cierto disciplina den cas. Tin un dokter pa atende cu e adictonan, caminda cu e psiquiatra a wak 218 cliente, e 'verslavingsarts' a wak 62 cliente.

E psicologo clinico a wak en total 180 cliente cu ta individual sin conta e clientenan riba e departamentonan. Tin tres persona cu ta traha cu e organisacion cu ta traha mas riba caya. Nan a wak 1344 cliente aña pasa, di cual mil di nan ta hobennan. Banda di esaki Minister dia 15 di maart 2012 a bin cu e liña 190 caminda cu na maart 2012 te cu na December e la atende 200 crisis. 45 di nan tabata cu mester a haci bishita na cas. E cifranan aki ta loke e organisacion a registra, cu ta muestra cu e problema ta grandi. Mester compronde cu e ta un malesa, pero e malesa mester keda trata y esey ta un responsabilidad di tur hende.

REINTEGRACION

Loke cu FMA ta ' bezig' cun'e actualmente ta e proyecto di reintegracion. E proyecto aki yama Libera.

E intencion di e proyecto aki ta cu a cera cierto acuerdo di cooperacion cu diferente organisacion, cu ta nifica cu e clientenan ta bay haci algo bek pa comunidad.

MONUMENTENZORG

A reuni cu Monumentenzorg, caminda cu e clientenan di FMA ta bay yuda cu e renobacion di e monumentonan cu ta bay cuminsa dentro di poco. E intencion ta cu e clientenan ta bay haya guia di un personal di FMA y nan ta bay traha hunto den centro di ciudad. E motibo di esaki ta pa muestra cu e personanan aki por haci algo pa comunidad. E intencion di e programa di reintegracion ta, cu e hendenan aki ta bay traha riba un sistema di terapia.

Cu esaki e hendenan den comunidad por wak cu e adictonan aki tin habilidad pa haci algo bek pa comunidad. □